

SAMÞYKKT

um fuglaveiði í Drangey.

1. gr.

Þegar vika er liðin af sumri, skal þeim, sem fengið hafa leyfi Drangeyjarnefndar og lögheimili eiga í Skagafjarðarsýslu eða Sauðárkrókskaupstað, heimilt að fara til Drangeyjar til undirbúnings veiðum við eyna og hafast þar við á „Fjörunni“, meðan rúm leyfir, ef þeir ætla sér að stunda svartfuglaveiði með flekum í landhelgi eyjarinnar. Fuglaveiði með flekum má stunda frá 20. maí til 7. júlí, og hámarkstala fleka á sjó hverju sinni má ekki fara yfir 400.

Umsjónarmaður eyjarinnar, sbr. 8. gr., skal gæta þess vandlega, að rúmið sé notað sem haganlegast. Verði ágreiningur um tjaldstæði, ræður úrskurður umsjónarmanns. Með orðinu landhelgi í samþykkt þessari er átt við 2 km svæði út frá eynni og Kerlingunni og umhverfis þær.

2. gr.

Heimilt er mönnum, þegar þeir koma til veiðanna, að ryðja uppsátur fyrir báta sína sem næst tjaldstæði sínu eða þar, sem hentast þykir á Fjörunni, ef áður er ótekið af öðrum, og heldur hver sínu uppsátri þá vertíð. Séu 2 för í félagi, er formaður skyldur að setja annað farið upp fyrir hitt, ef annarra för fá eigi viðunanlegt uppsátur að öðrum kosti. Verði ágreiningur um uppsátur, ræður úrskurður umsjónarmanns.

3. gr.

Allir skulu skyldir til að fara út að vitja um niðurstöður sínar á sama tíma, tvisvar á hverjum sólarhring, eftir því sem formenn og umsjónarmaður koma sér saman um. Bannað er að nota lifandi fugl að bandingja. Ávallt þá er veðurspá eða veðurútlit boðar hindrun umvitjana, skal leitast við að leysa af fleka eða snúa þeim við. Umsjónarmanni er skylt að sjá um, að þetta boð og bann sé haldið.

4. gr.

Aldrei má skjóta fugl eða hleypa af skoti í Drangey og Kerlingunni né í landhelgi hennar.

Þó skal í samráði við umsjónarmann vera heimilt að skjóta gripfugl, er leggst til skemmda á veiði manna, enda brjóti það ekki í bága við fuglafriðunarlög.

5. gr.

Þeir, sem róa til fiskjar frá eynni, skulu svo sem kostur er á forðast að styggja fuglinn frá niðurstöðunum. Einnig er bannað að leggja fiskilóð innan um niðurstöðurnar, svo og að fiska þar á handfæri um umvitjunartíma.

6. gr.

Hver maður, sem stundar fuglaveiðar á fleka við Drangey eina viku eða lengur, skal greiða í fjörutoll 25 krónur. Sama gjald greiðist fyrir hvern bát, en hafi skipshöfn aukafar — fuglfar —, greiðist fyrir það 15 krónur. Fjörutoll ber formanni hverjum að greiða fyrir sig og sína skipshöfn, þá er þeir hafa stundað veiði við eyna í eina viku.

7. gr.

Sýslunefndin eða sýslunefndaroddviti byggir eyna til 3 ára í senn til eggjatöku, og gefur oddviti sýslunefndar leigutaka byggingarbréf, sem skýrt tekur fram, hvað

það er, sem byggt er, til hve langs tíma og með hvaða skyldum. Skyldur er leiguliði að hreinsa hjargið yfir Fjörinni og annars staðar, þar sem tjöld eru sett undir því, gegn gjaldi, er nemur allt að $\frac{1}{4}$ hluta af eftirgjaldi hans. Skal hreinsunin fara fram á þeim tíma, sem umsjónarmaður telur hentugastan. Leiguliða skal bannað að stunda eggjatöku lengur en til 14. júní. Leiguliða skal skylt að taka rituegg og fýlsegg úr björgum eyjarinnar, eftir því sem hann getur við komið.

Eftirgjald það, sem leiguliða ber að greiða auk framangreindrar þóknunar, greiðist oddvita sýslunefndar fyrir lok vertíðar ár hvert.

8. gr.

Nefnd sú, er stjórnar málefnum Drangeyjar samkvæmt eignaskiptasamningi, útvegar á ári hverju umsjónarmann, sem hefur á hendi eftirlit með því, að þeir, sem stunda veiði við eyna, og leiguliði eggversins hlýði fyrirmælum samþykktar þessarar. Ber umsjónarmanni að gæta þess vandlega, að fugl sé ekki veiddur í eynni né í Kerlingunni með speldum, háfum, flekum eða á annan hátt. Ekki má heldur drepa lunda eða taka egg hans uppi á eynni. Enn fremur hefur umsjónarmaður á hendi innheimtu á gjaldi því, er ræðir um í 6. gr. Einnig skal hann heimta skýrslu um fuglaveiði af formanni hverjum eftir hverja viku, svo og af eggjatökumanni skýrslu um tölu eggja, þá er eggjasigi er lokið.

Umsjónarmaður semur því næst aðalskýrslu um fuglaveiði og eggjatöku, sem hann skilar oddvita sýslunefndar, ásamt fjörutollum, fyrir lok júlímánaðar ár hvert.

Fyrir starf sitt fær umsjónarmaður hæfilega þóknun, sem greiðist af tekjum eyjarinnar.

9. gr.

Heimilt er sýslunefndinni, ef henni þykir ástæða til, að gera sérstakar ráðstafanir í því skyni, að útrýma úr eynni ritu og öðrum vargfugli, sem spillir svartfuglaveiði við eyna, þó svo að gildandi friðunarlög séu haldin.

10. gr.

Friðlýst skal eynni á öllum manntalsþingum sýslunnar fyrir öllum óleyfilegum afnotum. Öll landspell á eynni eða skemmdir á festum þeim, sem henni fylgja og mönnum verður um kennt, varða sektum og skaðabótum.

11. gr.

Brot gegn ákvæðum samþykktar þessarar varða sektum allt að 2000 krónum. Lágmarkssekt fyrir að skjóta í Drangeyjarbjörg og Kerlinguna skal vera 100 krónur.

Að öðru leyti skulu refsíákvæði 33. greinar gildandi laga nr. 63/1954, um fuglaveiðar og fuglafriðun, gilda, að því er tekur til samþykktar þessarar og eftir því sem við á, svo og um upptöku á ólöglegu veiðifangi og hagnaði af veiði og veiðitækjum.

12. gr.

Mál, sem rísa út af brotum gegn samþykkt þessari, skulu rekin að hætti opinberra mála.

Samþykkt þessi staðfestist hér með samkvæmt 14. gr. laga nr. 63/1954, um fuglaveiðar og fuglafriðun, og öðlast þegar gildi.

Í menntamálaráðuneytinu, 9. júní 1962.

F. h. r.

Birgir Thorlacius.

Arni Gunnarsson.